

DEN AMBIENTE

UN AÑA DI EXISTENCIA EXITOSO PA AFRICAN PRIDE...

** Siman pasa dia 23 di februari e fenomenal grupo di baile di "Chocolate City" San Nicolas, AFRICAN PRIDE, a cumpli cu nan prome aña di existencia, cual tabata uno sumamente exitoso.

African Pride a nace durante e eleccion di Reina grandi di Carnaval 1995, na unda nan a forma un grupo di baile bao direccion di Helen Mohamed (Mama di Carnaval 1996) pa asina apoya e Reina di San Nicolas Annemarie Mohamed den Aruba Entertainment Center.

E show di African Pride segun comentario mester a sali e show di anochi, ya cu nan show tabata uno espectacular. Despues di eleccion e show di African Pride a ser hopi comenta. E acohida tabata asina positivo, cu e idea a lanta pa sigui duna show di baile.

Tabata Marcia Stamper cu a solicita e grupo pa acompaña nan grupo durante e dos paradanan di Carnaval, San Nicolas y Playa. Durante e dos paradanan aki, tambe Africa Pride a sobresali y hasi un impacto total.

E impacto tabata asina grandi, cu despues di e temporada di carnaval, yamadanan tabata drenta un tras di otro na cas di Helen Mohamed.

Mirando e interes inmenso, e grupo a tuma e decision pa sigui brinda nan show di baile. Nan a tuma e iniciativa pa cuminsa inmediatamente cu ensayonan intensivo.

Un di nan prome meta tabata pa organiza fundraisingnan pa asina realiza un viaje pa St. Maarten, pa duna algun presentacion durante e siman di carnaval. E fundraisingnan a bay den un forma sumamente exitoso, pa cual nan a realiza nan viaje pa St. Maarten.

Loke tabata lamentable, cu nan no a haya e oportunidad pa presenta durante e siman di carnaval na St. Maarten pa motibo cu nan no a establece un mihor contacto.

Pero si e experiencia di e viaje pa St. Maarten a duna su fruta, ya cu nan a sera conoci



cu e hit "Balance Party" y "Banana Way" cualnan tabata e dos roadmarchnan di e carnaval.

Tog durante e "last lap" di carnaval, nan a haya un oportunidad y a probecha pa drenta den e parada. Nan a duna un show cu a causa un furor grandi serca e hendenan na banda di caminda.

Na nan regreso na Aruba, African Pride a cuminsa ensaya inmediatamente riba e hit "Balancy Party", cual nan a escohe como nan cancion principal pa nan proximo shownan. E estilo di baile riba e hit aki, a ser crea pa nan mes. Cu nan estilo nobo y creativo nan a ranka sali y a causa furornan tur caminda cu nan a sa di presenta. Durante un di nan presentacion durante e grandioso Bingo di Royal Cabana Casino den e luoso Tropicana showroom, African Pride a sa di conquista curasonnan di un y tur.

Exito tras di exito e fenomenal grupo di baile aki a sa di cosecha den tur nan presentacionnan, tanto pa festivalnan di canto, shownan cultural, hotelnan na unda e turistanan a keda masha encanta.

Aña 1995 tabata un aña sumamente exitoso pa e tremendo grupo di baile cu a trese un dimesion nobo aki na Aruba den e mundo di baile.

Pa e hecho aki tambe merecidamente nan a ser galaradona durante e prestigioso premio DEN AMBIENTE AWARD 1995 como e REVELACIONAN DI AÑA.

E aña aki tambe nan a cosecha hopi exito durante e recien temporada di Carnaval, na unda nan a bolbe presenta un show di baile maravilloso durante e recien eleccion di Reina grandi di carnaval, cual un di nan integrante Indra Stamper tabata e Reina di nan mes grupo African Pride.

Durante e eleccion di Reina grandi ademas di un show pa nan propio Reina, tambe nan a duna un show pa e Reina di San Nicolas.

Siman pasa African Pride den un forma unico a celebra nan prome aniversario cu un Santo Sacrificio di Misa na Blue Army na San Nicolas. Despues di e Santo Sacrificio di Misa, e celebracion a continua engrande na cas di Annemarie Mohamed.

Durante e celebracion aki, tabatin un gesto masha bunita mes caminda tur esunnan cu a hasi un aña a ricibi un recuerdo y alavez un buki di banco pa asina stimulan pa cuminsa spaar pa nan futuro.

Pa loke ta trata e futuro proyectonan di African Pride pa aña 1996, mayan diadomingo

dia 3 di Maart, nan ta inaugura un show nobo na Tamarijn Beach Hotel cu ta hiba e titulo como "Caribbean Latin Music", den cual African Pride lo ta e atraccion especial di e anochi.

Tambe cuminsando prome di April, tur diamars nan lo presenta durante un show

turistico na Playa Linda cu yama "Caribbean Festival". Tur e dos shownan aki lo ta pa 8:30 p.m. combina cu un suculento buffete.

Na ultimo Jossy Maduro actual president di African Pride kende a relata e relato aki exclusivamente pa DEN AMBIENTE, a duna di conoce cu e aña aki nan ta bolbe realiza un viaje pa St. Maarten, na unda ya caba e contactonan a ser establece pa algun shownan durante e siman di carnaval.

Na luna di October henter e grupo di African Pride y nan famianan lo bay goza merecidamente di nan vacacion na Disney World na Orlando, Florida.

Pa tur esnan cu ta desea un show fabuloso di African Pride, por tuma contacto libremente cu Jossy Maduro na su cas tel:48853, trabao tel: 11000 of tambe serca Annemarie Mohamed na telefon of fax: 46249. DEN AMBIENTE ta desea e fenomenal grupo di baile AFRICAN PRIDE, hopi pero hooopiiiiii aña mas di EXITOOOOO...

Mayan diadomingo den Cas di Cultura...

GRUPO PRETI WOWO TA RIPITI NAN SHOW CULTURAL "MI INFANCIA" ..

** Despues cu aña pasa den luna den November e tremendo grupo infantil "Mi Preti Wowo" a presenta nan show cultural "Mi Infancia" den un forma sumamente exitoso, e demanda tabata asina grandi cu nan a haya nan mes obliga di complace e tantisimo sugerencianan pa un repeticion.

E fabuloso show cu ta hiba e nomber "Mi Infancia", lo tuma lugar mayan diadomingo 3 di Maart pa 4:30 atardi.

E artistanan cu lo participa den e show ta: Cos di Mucha, Quincy Hasham, Francella Jacobs, Saca Ritme, Pierre Greaux y unsorpresa cu sigur lo bay cay na agrado di un i tur.

E show tin como meta pa recauda fondo pa e muchanan por realiza na viaje pa Bonaire, caminda nan lo duna un presentacion tambe.

Na esnan interesa, tin un package tour organiza pa compana e muchanan riba e viaje pa Bonaire.

Pa mas informacion pa e package por tuma contacto cu Señora Egidia na telefon 51500.

DEN AMBIENTE ta desea e tremendo grupo infantil cultural "Preti Wowo", hopi exito cu repeticion di nan show, pa asina nan por cumpli cu nan meta pa realiza nan viaje pa hermana isla Bonaire...